

Fundamentus i prinsípius inklusu i sentradu na ekuidadi Involvimentu Kumunidadi

Fundamentus

1. Kés ki ta ser afetadu di un manera disproporsionadu pa mudansas klimátiku ten direitu di partisipa na prusesu di tomada di disizons rilasionadu ku dizinvolvimentu di sés riziliensia.
2. Ixpiriensia ki vivedu pa kénha ki ta pasa pa vulnerabilidadi susial é prokuradu, rikunhisidu i valorizadu na prusesu di difinison di prublemas, perguntas i sulusons.
3. Informasons nisisáriu pa partisipa ativamente komu kulaboradoris na un prusesu di tomada di disizon é dadu pa menbrus di Eji otus populasons prioritáriu di maneras ki és podi absorvi i konpriendi más fásil, ku tenpu i apoiu sufisienti pa intirpreta.
4. Nisisidadis, priokupasons, objectivus i prioridadis di menbrus di kumunidadi, i spisifikamenti Eji otus populasons prioritáriu, ta influensia disizons. Modi ki keli ta fazedu é partilhadu i kumunikadu di un manera transparenti.
5. Involvimentu é rilasional i ka tranzasional. Prusesu ten objetivu di konstrui i manti rilasons baziadu na respetu mútu i na risiprosidadi.

Prinsípius fundamental

1. Valoriza kunhisimentu i lideransa lokal.

Menbrus di kumunidadi ten kunhisimentu diretu sobri diferentis pontus fortis, prublemas i oportunitadís ki ten na sés kumunidadís. Kés kunhisimentu li ta da informasons i kontekstu inportanti pa disizons ki guvernus lokal mesti di toma.

1A Diversifika inkluzon na tudu prusesu. Partisipason diversifikadu na planiamentu i prusesus di involvimentu i riprizenstason na órgons di tomada disizon é isensial pa manti fundamentus ki listadu di riba. Konsentra na txiga na pisoas ki stórikamenti ka ten stadu involvedu na prusesus di planiamentu i parserias ku un diversidadi di pisoas i grupus na sés asons di divulgason i involvimentu – prinsipalmenti populasons di Eji otus populasons prioritáriu.

1B Inklui pisoas antis di inportantis disizons é tomadu. Pisoas más inpakitádu pa un disizon debi ser involvedu dés di inísiu na difinison di prublemas ô kistons, i modi ki sulusons ta ben parsi i ta kunpri pa kumunidadi. Dizinvolvi parserias ku líderes lokal ki sta trabadja di un kapasidadi informal ô formal pa apoia i difendi nisisidadi di pisoas na sés kumunidadi (ki ta inklui intendi di sés nisisidadi, prioridadi i prions ki ta kunpiti) podi djuda stabilesi ligasons ku menbrus di kumunidadi ki bu ta buska involvi i prenda di el. Aloka orsamentu na bus prujetus pa kumpensa dirijentis lokal pa sés tenpu i kontributus.

1C kumesa pa prioridadi di kumunidadi. kuzé ki é inportanti pa Eji pa otus populasons prioritáriu podi ser diferenti di kel ki é inportanti pa funsionáriu munisipal ô pa pisoas ki ka ta vivi na kés kumunidadi la. Rispeta direitu di pisoas pa ditirminason própriu ta iziji partilha – ô mesmu transfiri – kontrolu di disizons pa pisoas ki ten ki vivi ku ô ki supostamenti ta binifisia di kés disizons la. Partilha tomada di disizons di kel manera li tanbé ten binifisiu di kria kunfiansa.

1D Onra kapasidadi i ixfiriensia dja ta izisti na kumunidadi. Foka na pontus forti, talentus, abilidadi, rikursus i kapasidadi prizensti na un grupu di pisoas ô lokal i prioriza kés rikursus li na bu involvimentu. Pur izenplu, txeu kumunidadi dja ta pasa pa inpakitus di mudansas klimátiku i di otus krizis sen pridentis, ki ta inklui pandemia di COVID-19. Rikunhesi rikursus kumunitáriu ki foi dizinvolidu na risposta, sima kriason di spasus kumunitáriu, redis di ajuda risípriku ô métudu pa partilha informason. Konsidera modi ki bu podi aproveita kés rikursus li pa involvimentu i modi bu podi trabadja ku grupus i organizason kumunitáriu pa apoia i ixpanditna sés trabadju ki dja és sta ta fazi. Valoriza ixfiriensia ki vivedu — kunhisimentu ki ta ben di ixfiriensia dirétu — komu un pirseson fundamental pa orienta planiamentu i tomada di disizons.

1E Uza dados i fala ku pisoas. Dados inklúidu na fontis sima sensus di EUA é inportanti pa kumesa ta intendi karaterístikas di vulnerabilidadi na bu munisípiu. Faramenta online GEAR ta dau asesu pa alguns di kés dados li. Nu intantu, na prioriza kontatu ku kumunidades i konversa ku pisoas é tanbé isensial; dados dispunível sobri pisoas ki ta vivi i ta trabadja na kumunidade podi ka ser sufisientimenti ditalhadu pa konpriendi plenamenti vulnerabilidadis ki pisoas ta pasa pa el, i ka ta da informasons sobri sés prioridadis.

2. Fazi inkluzon i di asesibilidadi un prioridadi.

Prumovi inkluzon i asesibilidadi signifika garanti ki tudu pisoas, independentimenti di rasa, identidadi di jéneru, kapasidadi, etnia, kondison ikunómiku, nasionalidadi ô orientason sexual, xinti akolhidas, respetadu i kapasitadu pa partisipa na disizons rilasionadu ku prujetus i ku planiamentu di bu kumunidade.

2A **Bai undi pisoas sta i undi és ta xinti siguru.** Kuandu ta entra en kontata ku pisoas ki tradizionalmenti ten stada ixklúidu di prusesus di planiamentu, ta prioriza bai ti undi ki kel kumunidade la ta riuni ô ta vivi – i ta xinti siguru. Keli podi inklui parserias ku organizasons lokal ô grupus kumunitáriu pa partisipa na iventus dja izistenti, ô ainda ospeda iventus tenpuráriu ô konversas ku pisoas na spasus undi pisoas ta riuni – ker for na un parki ô parki infantil, na un restauranti lokal ô na un feira di prudutoris. Konsidera pusibilidadi di stabilesi parserias ku asistentis susial pa atxa lokal di riuni asesível na skolas, klíniku di saúdi ô gabinetis di organizasons kumunitáriu. Nu intantu, é inportanti rikunhesi i respeta kuandu ta bai na un spasu kumunitáriu ka é dizejadu pamodi falta di kunfiansa. Na tal kazu, trabadja ku parserus ki é di kunfiansa di kumunidade ta djuda atxa maneras di interaji ku respetu i kuidadu.

2B Uza un linguajen asesível i sentradu na pisoas. Uza un linguajen klaru i dirétu ki ta rifliti i xpiriensia di pisoas i ta difini palavras-xavi i konseitus ki podi ser diskunhisidu. Ivita linguajen tékniku, siglas i idioma (ixprisons sima "sta txobi gatu i katxor") ki ta iziji kunhisimentus spesializadu ô ki é más difísil di traduzi entri kulturas i línguas. Adota un linguajen ki ta prioriza pisoas primeru en vez di bareras ô disvantajens ki un individu ta lida ku el na sés vida. (Pur izenplu, uza "pisoas ku difisiensia" en vez di "pisoas ku difisiensia" ô "pisoas na situason di sen-abrigu" en vez di "pisoas sen-abrigu".)

2C Presta sirvisus di traduson i intirpritason. Fazel komu un prátika kumun pa traduzi material pa línguas más faladu na bu kumunidade, pur alén di inglês, i providensia intirpritason na iventus. Kuandu bu prinsipal objetivu é pa alkansa un kumunidade ki ta fala un língua diferenti di inglês, fazi iventu na kel língua la i oferese intirpritason pa falantis di inglês. Txeu plataformas online, sima Zoom, ta puzibilita intirpritason simultâniu di línguas, ki ta pirmiti kanal di áudiu siparadu pa intérprites. Ten un kontratu di staduki munisípius podi uza pa kontrata fornecedoris di sirvisus di traduson i intirpritason.

2D Ixpanði asesibilidadi pa tudu nível di abilidadis. Ilabora dukumentus ki podi ser lêdu pa software di konverson di textu pa voz pa pisoas ki ta binifisia di leitura di textus na voz altu. Inklui opsons di lejendas okultu na vídeos i plataformas di riunions online, i intirpritason na língua jestual merkanu (ASL) kuandu nisisáriu na iventus prizensial. Txeu plataformas online, sima Zoom, ta da opsons di lejendas okultu.

2E Kria mútiplas formas pa pisoas ten informason ô pa partisipa. Ospeda riunions i iventus na diferentis mumentus di dia, ki ta inklui fins di semana i noites, podi djuda akumoda diferentis orárius di trabadju. Konsidera kunprimisus sazonal sima siklus agrikultural i orárius di skola kuandu ta skodji ora di iventu. Uza diversus stratéjias diferenti tanbé ta djuda aumenta partisipason i ta satisfazi nisisidadis kultural di diferentis grupus. Oferese opsons íbridu ô virtual pa ki pisoas podi partisipa online, ô transmiti iventus en dirétu através di kanal di tilivizon lokal ô na plataformas sima Facebook Live. Otus opsons di involvimentu sima inkéritus ki podi ser kompletadu na kualker mumentu, podi tanbé ser bons alternativas pa obi opinion di pisoas ki ten menus probabilidadi di partisipa na un riunion ô iventu.

2F Inklui família interu. Disponibiliza sirvisus di krexi i rifeisons duranti riunions pa fasilita partisipason di pais, irmos más bedju i otus kuidadoris. Konsidera stabilesi parserias ku organizasons kumunitáriu ô sentrus di rikreiu munisipal ki podi djuda da instalasons ô sirvisus di kuidadus infantil. Adapta konversas pa inklui jovens i, kuandu rilivanti, kria atividadis pa tudu família, pa ki pisoas di tudu idadis podi partisipa.

2G Fasilita transporti pa iventus prizensial. Silisiona lokal próximu di parajens di transportis públiku i/ô asesível di bisikleta ô a pé ta fasilita partisipason di pisoas ku difisiensia i pisoas ku opsons di transporti limitadu, ki ta inklui jovens. Konsidera da vales di transporti pa riduzi kustu ô organiza un sirvisu di boleias ô transporti partilhadu pa fasilita asesu pa transporti.

2H Rispeta prátikas kultural di bus vizinhos. Prátika sentradu na ekuidadi ta iziji rispetu i integrason di prátikas kultural di pisoas di kor, imigrantis i otus grupus ki ten stadu tradizionalmenti ixklúidus ô sub-riprizentadu na kumités i prusesus di disizon di governu lokal. Pur izenplu, keli podi signifika ki riunions kumesa ku un rifeison i ordi di trabadjus só ta kumesa dipós di rifeison tirmina, ô ki ten más tenpu pa konversa antis di aborda kualker pontu di orden di trabadjus. Tenpu adisional pasadu djuntu ta da oportunitadi pa kria rilasons fora di prujetu spisífiku ki sta trabadjadu na el.

3. Prumovi un kunpromisu longu prazu

Involvimentu ekuitativu é un prusesu kontínu ki ta involvi dizinvolvimentu di rilasons, intendimentu partilhadu i maneras di trabadja konjuntu baziadu na rispetu kumun i na kunfiansa. Kuandu ta pensa na involvimentu, konsidera modi ki intirasons i kulaborasons ta bazia na ixpiriensas pasadu, ta kontribui pa rilasons más forti pur alén di prujetu imidiátu i ta apoia Eji otus populasons prioritáriu ki sta partisipa na futurus prujetus di planiamentu ô kumités konsultivu.

3A Tra tenpu pa kria rilasons. Txeu kumunidades ki ten pasadu longus stórias di ixkluzon, marjinalizason i danus di prusesus di planiamentu guvernamental, ki ta inklui kumunidades di rasa negra, indíjenas i di otus minorias étniku, pisoas di baxu rendimentus i pisoas ku difisiensia, nutri un setisismu ben fundamentadu en rilason a partisipason na prujetus guvernamental. É podi leba tenpu pa ripara rilasons i kria kunfiansa. Si tentativas di kontatu inisial ka for ben-susididu, konsidera trabadja ku parserus di kumunidade pa konpriendi motivu i ki mudansas ô mididu adisional podi ser tomadu pa kria kunfiansa i poi interason más valiozu, konvidativa ô rilivanti pa kumunidade ki bu sta spera alkansa.

3B Rikunhesi danus stóriku. Rikunhesi stória di prikonseitu sistémiku i marjinalizason ki ten stadu perpetuadu i ki ten lideradu pa aumentu di vulnerabilidadi klimátiku di pisoas ki ta vivi ô ta trabadja na bu kumunidade. Atxa maneras di inisia prusesu di riparason di danus podi, as vez, parsi ma é un tarefa di más pamodi magnitudi di tarefa. Kumesa di pikinoti podi djuda. Tudu munisípiu ten txeu maneras di konta stória. Kés stórias li é frikuentimentu uzadu komu narativas fundamental na dukumentus sima planus kumunitáriu, websites, livrus ô artigus. Nu intantu, maioria di kés stórias li é unilateral i ten intenson di riforsa un úniku perspetiva. Un ason pa konsidera ta inklui konstituison di un grupu di trabadju

tarefadu ku dizinvolvi un narativa más inklusivu. Keli podi inklui trabadja ku spesialistas indíjenas pa konpriendi stória di lokal i inkurpora kel perspetiva li na stória di sidadi. Kel informasons li podi dipós ser uzadu na website i na kualker otus dokumentus di futuru.

3C Prumovi transparênsia. Transparênsia é fundamental pa konstrui i manti rilasons. Falta di partisipason na inisiativas di involvimentu podi ser, txeu vez, rizultadu di menbrus di kumunidade xinti sima ki sés opinions i vozes ka sta ser obidu, ô fika ta xinti sima ki nada ta rizulta di kontributus ki és ta da. Pa aborda kel problema li, é inportanti ten klareza sobri sés objetivus di involvimentu, modi ki bu ta spera pa uza kontribuisons di kumunidade i fazi un siguimentu pa partilha rizultadus. Internamenti, é tanbé inportanti konpriendi rikursus umanus i finanserus ki bu ten didikadu pa isforsus di involvimentu, pa ivita prumesas ixajeradu pa públiku.

3D Kria rilasons mutuamenti benéfiku. Trabadja pa intendi modi ki munisípiu podi apoia nisisidadis i objetivus di kumunidade i partisipa na isforsus kumunitáriu. Konsidera modi ki kualker atividadi di involvimentu podi apoia un rilasionamentu kontínu, i ka só rikolha di informasons pa atendi objetivus di prujetu. Keli podi inklui:

- Trabadja ku líderis kumunitáriu pa identifika maneras di apoia kapasidade di kumunidade, ki ta inklui stratéjias distínadu pa dizinvolvi ô ten asesu a novus abilidadis, kunhisimentus, redis susial, rikursus ô fontis di finansiamentu ki ta pusibilita kontinuidadi di trabadju di riziliensia ô difeza pa trabadju riziliensia mesmu dipós di un prujetu tirmina.
- Da rizidentis un maior klareza sobri funsons di guvernu lokal, ki ta inklui rason di izistênsia di un ditirminadu dipartamentu, modi ki é ta sirvi kumunidade i modi ki rizidentis podi difendi ô influensia dizinvolvimentu di pulítikas ô prugramas.

3E Integra alegria. Inisiativas di divulgason i involvimentu debi ser planiadu pa ser alegri, divirtidu i fomenta speransa. Trabadju di riziliensia klimátika dja é difísil. Kria rilasons é difísil. Na pol divirtidu ta djuda ultrapasa partis difísil.